

11-48  
15-48  
HARANGVE  
DE LA VILLE

DE PARIS

A MONSIEVR  
DE BROVSSEL,  
CONSEILLER DV ROY,  
Sous-Doyen de la grand' Cham-  
bre, & Preuost des Marchands de  
Paris.



A PARIS,  
De l'Imprimerie de la Veufue I. GUILLEMOT, Impri-  
meuse ordinaire de son Altesse Royale, rue des mar-  
mouzets, proche l'Eglise de la magdeleine.  
M. DC. LII.







**HARANGVE DE LA VILLE**  
*de Paris à Monsieur de Broussel Conseiller du*  
*Roy, Sous-Doyen de la Grand'Chambre, &*  
*Prenost des Marchands de Paris.*



**MONSIEVR,**

C'est aujourdhuy qu'il faut que les plus mes-  
 chans & les plus enuieux confessent que Dieu vous  
 a réservé pour le salut de la France, & qu'il veut  
 que vous rendiez la vie & la liberté à ce grand peuple qui vous  
 l'a conseruée, & qui s'est armé si amoureusement pour vous ti-  
 rer des mains du Tyran qui les oppresse. Il falloit vne vertu  
 comme la vostre pour s'opposer aux crimes & à la rage de l'e-  
 stranger qui a iuré nostre ruine, à cause que nous ne pouuons  
 souffrir celle de tout l'Estat, & que nous sommes resolu de de-  
 fendre la Capitale & le Chef pour maintenir toutes les parties.  
 Les idolatres du Cardinal Mazarin sont assez traistres à leur pa-  
 trie & assez esclaves de l'insolence de sa fortune pour nous ac-  
 cuser de rebellion; Mais les amateurs de la Royauté, & les fi-  
 deles subjets du Roy approuueront tousiours nostre zele, &  
 foueront éternellement la grandeur de nostre constance, & la  
 iustice de nos resolutions.

Nostre Roy qui est captif entre les mains des proscripts &  
 des ennemis de son Estat, ne pouuant plus agir de luy-mesme,  
 ny par les mouuemens qui le font pere de son peuple, & proté-  
 cteur de ses subjets; a besoin que les libres qui conseruent son  
 throsne, & qui gardent le lit de sa iustice, empeschent que ceux  
 qui abusent de son nom & de sa personne ne s'emparent encore  
 de son pouuoir & de son autorité.



Il y a quatre ans que le Mazarin ne pouuant plus soustenir la guerre sur les frontieres esloignées, l'a fait naistre & fait venir au milieu, & dans le cœur du Royaume; Et comme si ce perturbateur du repos public estoit payé pour trauailler à la destruction de ce grand Empire, nous n'y voyons plus que des pertes & des desolations, & semble que tout son credit ne soit plus que pour renuerser nostre Monarchie. Nous voyons, & non sans douleur, nostre ieune Roy errant comme vn Carabin parmy le Royaume, les gens de bien n'oser plus l'approcher ny luy parler, les Deputez du Parlement arrestez prisonniers contre la foy publique & contre les paroles de sa Majesté: La Religion & la Pieté bannies de la Cour, la Iustice n'y est plus reconuë, le commerce cessé par tout, le peuple aux abois, & tout l'Estat dans son penchant. Et tout cela parce que le Mazarin violente les volontez de sa Majesté, corrompt le petit nombre d'Officiers qu'elle a aupres de soy, achete à beaux deniers comptants l'infidelité de ceux qui fomentent ses desordres & son ambition, & donne toutes les charges à ceux qui luy promettent de tromper le Roy, & de persecuter ses subjets.

Puis donc, Monsieur, que ces pestes publiques, & ces fauteurs de la tyrannie sont chassés honteusement, & que tous les ordres de l'Estat ont jetté les yeux sur vous pour leur donner vn successeur, qui fasse connoistre au Roy & à ses subjets ce qu'ils doiuent estre & ce qu'ils doiuent faire. Nous nous promettons de vostre Vertu, que vous attachant au seruice de sa Majesté, & au soulagement de ses subjets, comme vous auez tousiours fait; Vous dissiperez ces monstres de la tyrannie, vous ramenez nostre Souuerain dedans sa Capitale, vous reestablirez le commerce dedans la Ville, & ferez par vos soins & vostre sage conduite, que ce grand peuple dont vous estes le Chef & le Pere, ne boiue plus de larmes, & ne mange plus de ce pain de douleur qu'il faut qu'il achete au prix de son sang, & par le nombre infiny de ses trauaux.

Vous connoissez la malice des Tirans qui nous oppressent, vous estes du nombre de leurs victimes, & du rang de ceux dont l'innocence & l'integrité leur est suspecte & odieuse. C'est pourquoy, Monsieur, il ne faut pas trouuer estrange si vostre Vertu

qui



qui n'est pas capable de corruption, s'est renduë criminelle auprès de ceux qui n'en sçauoient souffrir l'esclat, & qui ne demandent que des complices & des muets pour excuter leurs mauuais desseins, en opprimant les peuples, & ceux qui les protegent. Et c'est pour cela qu'on vous a veu enleuer d'entre les bras de Messieurs vos enfans pour vous releguer iniustement, & vous enuoyer dans vn exil, qui est la moindre peine que puissent attendre les auteurs d'un conseil si funeste pour eux, & si glorieux pour vous; puis qu'il est si veritable que vostre probité ne pouuoit estre reconnuë ny recompensée, qu'en faisant armer toute la France pour la deffendre & pour la proteger; ce qui s'est fait si promptement & si glorieusement, qu'on peut dire que c'est plustost vn coup du Ciel, que non pas vn ressentiment des hommes, parce que ce miracle n'a point d'exemple, & que les siecles à venir ne produiront iamais rien de semblable. Ce tesmoignage singulier de l'affection veritable que l'on a pour vous, & ce consentement vniuersel qui porte tous les François à mourir plustost en vous conseruant, que de viure ou de languir en vous perdant, fait bien voir que vostre probité n'est pas commune: Et les preuues estonnantes qu'ils en laissent à l'immortalité sont des marques bien certaines que vostre iustice est plus qu'humaine, & que Dieu vous reserue à quelque chose de plus grand encore parmy tant de merueilles. Estant impossible de dire si vostre retour triomphant dedans Paris peut estre estimé plus grand & plus superbe que la sortie violente & precipitée qu'on vous en fit faire, parce que tant d'appareils & tant d'acclamations n'estoient que le desadueu & la reparation de l'iniustice qu'on vous auoit faite, & que vous auez veu vanger si hautement & si solennellement, puis que la douleur de vostre esloignement a effacé la ioye & le contentement des victoires & des conquestes que l'on celebroit si pompeusement. Les Ministres & les Conseillers de tant de violences en quittant leurs Hostels & leurs Palais dorez, auoient peine de trouuer de la seureté pour leurs personnes attaquées entre les bras du Roy & de la Reine Regente, pendant que vous esties porté sur les espauls d'un million d'hommes, & que vous ne pouuiez aborder vostre maison à cause du grand monde qui vous accompagnoit,



& qui vouloit vous y conduire en triomphe & en assurance. Vostre Compagnie qui ne sçait reuerer que les choses qui le meritent, fut en deuil pendant les trois iours de vostre absence & sçachant vostre retour qu'elle a tant combattu & demandé, voulut vous receuoir dedans son sein, & vous tesmoigner par la bouche de Monsieur le premier President l'estime qu'elle faisoit de vostre vertu, la consolation qu'elle auoit en vostre reünion, & la satisfaction qu'elle receuoit de reuoir l'objet de sa gloire, & l'ornement de sa reputation.

S'il est noble & auantageux d'estre loué par ceux mesmes qui meritent toute sorte d'estime & d'approbation. Voyez, Monsieur, le contentement que vous deuez auoir de connoistre qu'il n'y a point de cœur qui ne soit à vous, point de bouches qui ne chantent vos louanges, & point d'armes ny de puissances qui ne soient pour vous. Puis donc que le public vous regarde comme son Dieu tutelaire, & qu'il vous inuite par tant de ressentiment d'amour à luy continuer vos soins & vostre protection, faites comme Marc Caton, lequel apres auoir esté Consul, & obtenu l'honneur du triomphe, commença tout de nouveau à remettre sa vertu en pratique, & trauailler comme s'il n'eust rien merité de la Republique. Cinquante ans de seruite vous ont acquis le tiltre de Sous-Doyen parmy deux cens Senateurs, & si les merites & la vertu donnoient les rangs & les seances entre les hommes, asseurement vous seriez le premier & le plus esleué de tous, parce qu'il n'y a personne qui n'adouë & qui ne confesse que vous estes le plus parfait & le plus Religieux de tous.

On vous voit infatigable au trauail dedans vn âge qui rend les autres incapables de toutes choses; & semble que les soins que vous prenez de conseruer les biens & la vie d'autrui, soient les remedes & les restaurens qui augmentent & qui fortifient vostre santé & vostre vigueur admirable. On vous regarde aller tous les iours au Palais à pied à l'âge de soixante & dix huit ans par les pluyes & par les vents, par les froids & par les chaleurs les plus excessiues & les plus fascheuses, & ce pour espargner le sang du peuple & l'argent des pauvres plaideurs. On sçait que vos promenades, vos jeux, vos plaisirs, vos maisons de plaisance,



& vos diuertissement ne sont autres que l'exercice de vostre charge, & la pratique de toutes sortes de bonnes œuvres. On dit de vous ce que les Grecs disoient de Pericles, que parmy tant d'employs & tant d'affaires importantes, il n'augmenta iamais d'une seule dragme les biens que son pere luy auoit laissez: Ce noble reproche vous a esté fait en plein Senat, & celuy qui vous en accusa comme d'une iniure conforme à la corruption du temps, a esté condamné des gens de bien, & son imprudence a découuert vostre integrité en pensant la blasmer & luy donner atteinte.

Tous vos cliens confessent qu'au lieu de prendre de l'argent pour faire l'iniustice, vous refusez celuy qui vous appartient pour vos vocations; & les pauures publient par tout, que bien esloigné de receuoir les droicts & les espices qu'ils vous doiuent, vous leur en donnez du vostre propre pour leuer les Iugement & les Arrests fauorables qu'ils ont obtenu de vostre equité & de vostre protection, ie le scais, & ie l'ay veu apres beaucoup de tesmoins irreprochables. Vous auez cest auantage encore, avec quantité d'autres par dessus tous les Iuges, que s'il y en a qui facent la iustice comme ils doiuent, la plus part sont si rudes & de si difficile abord aux parties, qu'ils leur ostent la hardiesse de les approcher, & de leur faire entendre le fond & le merite de leurs affaires; ou vous les accueillez en tout temps & à toutes heures avec tant de douceur & tant d'humanité, qu'on peut dire de vous ce qu'un grand President de vostre Parlement asseure du Chancelier Hurault, qui estoit si affable & si facile que personne ne l'aborda iamais qu'il n'en soit retourné content & satisfait: Et avec le saint Iob, que quand vous parlez, vous consolez la vefue desolée, vous estes l'œil des parties aueugles en leurs causes, & le pied des boiteux, c'est à dire le support & le protecteur des foibles & des oppressez: Que vous brisez les machoires des meschans, & leur arrachez leur proye; à quoy i'adiouste avec ce mesme miroir de patience, que la iustice est comme un vestement colé sur vostre corps, que c'est l'entretien de vostre ame, & que vous ne cherchez autre gloire que celle d'un Iuge equitable.

Vous n'avez iamais fait attendre aucun de ceux qui vous



sollicitent, où il falloit que vous fussiez engagé avec d'autres plus pressez que vous ne pouviez quitter. Vous ne trouuez point de peine à sortir coup sur coup de vostre cabinet pour venir escouter ceux qui vous implorent; & l'on sçait que vous interrompez souuent vos repas, & vos propres affaires pour donner les audiences qu'on vous demande, & ce avec tant de complaisance & d'affabilité, que vous faites bien paroistre que vous ne voulez pas ressembler à ce meschant Iuge de l'Euangile, lequel n'escoutoit les cris des pauures, que pour les renvoyer & se deffaire plus promptement de leurs importunitiez; vostre logis n'estant pas comme celuy de tant d'autres, où il semble que les portes ne soient pas faites pour y auoir entrée, mais seulement pour esprouuer la constance, & redoubler la misere de ceux qui sont deuant.

Puis donc, Monsieur, que vous estes le Pere de la patrie, l'amour des peuples, le Restaurateur de la chose publique, le Defenseur de la Royauté, l'ennemy des desordres & de la tyrannie, le Protecteur des pauures, & le refuge des oppressez; esloignez avec nos Princes, & deux cent mille hommes qui sont las de souffrir iniustement vne poignée de brigands, & vn camp volant de picoreurs qui sont assez temeraires & assez insolens pour attaquer vn monde entier, empescher qu'on ne luy apporte les viures qui luy sont necessaires, & que son Roy qu'il demande & qu'il appelle tous les iours avec tant de tendresses, n'y vienne calmer tant de miseres, & n'y vienne receuoir les preuues & les rémoignages de l'amour & des respects que l'on y a pour sa Majesté, & pour les bons Magistrats qui l'y seruent vtilement comme vous.

FIN.